



● कोशरमान ताम्राकार

जन्म/स्थान : ने.सं. १०७७ कछलाथ्व ५ । बा : भिक्षुरत्न ताम्राकार । शिक्षा : स्नातककोत्तर । न्हापां प्रकाशित रचना : बाखं । कृति : मिफुति (बाखं), लागाय् जि (बाखं), जि विश्वासय् म्वाय् (बाखं) । थौंकन्हे अमेरिका ।

हिरामोति

जिगु नां हिरामान । वयागु नां मोतिशोभा ।
चीहाकलं धायेगु खःसा हिरामोति ।

वयात नापलाःबलय् जिं भिखुँदया ल्याय्
म्ह । अथे हे व नं भिखुँदया ल्यासे । निम्ह
ज्वलंज्वःपिं जिपिं निम्हं एसएलसी निगूगु श्रेणी
पास जूपिं थौं स्वयाः पीगुदं न्त्यो । जि जेपि
स्कूलं एसएलसि बियाम्ह । व कन्या मन्दिरं
ब्यूम्ह । निम्हेस्यां छगू हे इच्छा, डाक्टर जुइगु ।
उकिं जिं नं साइन्स कलेजय् भर्ना जुया । व नं
व हे साइन्स कलेजय् भर्ना जुल । निम्हेस्यां
छगू हे मेजर बायोलोजि गुगु भविष्य डाक्टर
जुइगु म्हगस तया ब्वनीगु विषय खः । थ्व
खँ जुल २०२४ सालया । जिमिगु न्हापांगु म्हं
म्ह खंगु कलेजय् भर्ना जुइ खुनु रजिष्ट्रेसन
अफिसय् । म्वः म्वः मनूत । फुक्क फर्म बुभे
यानाः ध्यबा पुलेगु व अफिसय् । व व जि छगू
हे लाइनय् । व भचा च्वये, जि भचा क्वय् ।
वं लिफः स्वयबलय् लाइनय् च्वनाच्चनाम्ह जि
लिसें ख्वाः छकः निकः चूलाः । न्हिले थें न्हिले
थें जू । नतुसुतु मजू । मनूत म्वः म्वः । व मछाःगु
जिं चाः । लाइनय् जि स्वयां व न्त्योने जूगुलिं
न्हापां वयागु फर्म बुभे यायेगु ज्या क्वचाल ।
जि लाइनय् तिनि । वं वंगु जिं स्वयाच्चना । व
लिफः स्वइगु आसय् । लिफः मस्वः ।

भर्ना जुयाः छवाः लिपा पढाई शुरू जुल ।

निदँ तक्क ब्वनाः आइ एस्सी पास जुइ ।
अले डाक्टर ब्वनेत अप्वः धयार्थे विदेशय् -
इन्दियाय् छात्रवृत्ति कयाः ब्वं वने गु चलन दु ।
जिगु उदे क्षय नं व हे खः । वयागु इच्छा नं व
हे खः । खला आइ एस्सी बायोलोजि ग्रुप छगू
हे जक । उकिं जिपिं निम्हं छगू हे क्लासय्
जुइगु जु हे जुल । हिरामान व मोतिशोभा ।
छगू हे क्लासय् लाःबलय् नतुसतु ब्याना
वल । लाय्बय् छता निता खँय् गवले वं जितः
ग्वहालि याइगु जुयावल । अप्वः धयार्थे जिगु
जिगु ग्वहालि वं यक्वः काःगु दु । जिमि दथुइ
थवंथवय् तसकं मिले जूपिं पासाकथं जुल ।
खँ निम्हेस् यां ब्याःपिं जुयावल । ई दइबलय्
निम्ह जक च्वनाः थःथःगु नुगः खँ ब्याके गु
नं जुयावल । जिमि दथुइ मतिना शब्द चाहिं
गवलें मब्याः । थःथःगु छँया बारे नं खँल्हाबल्हा
जुइगु । जिमिगु थथे खल्हाबल्हा वं जिमि
सकल परिवार म्हसीकल । जिं वयागु परिवार
म्हसीका । दच्छि क्वचाः मचाःनिबलय् जिपिं
थुलि सत्तिना वन कि जिपिं मचानिसें म्हस् यूपिं
पासापिं थें जुल । गवलें गवलें कलेजया कःसी
च्वनाः खँ ल्हाये बलय् क्लास शुरु जुइधुकूगु हे
मचाइयगु । ग्वःकः ग्वःकःला क्लास हे
त्वःपिक खँ ल्हाना च्वने गु । खँ नं गनं वः
गनं वः । घौ निधौ ख ल्हाःसां पूमवं ।
छकःनिकः जिमिगु चर्तिकला खनाः पासापिसं

बाखि

साहित्यिक लय्पौ

मिखा ज्वये पिया स्वइगु जिपिं निम्हे सिनं
चाः । तर व नं सुम्क, जि नं सुम्क । निम्हं
ख्याः ख्याः ल्वाकाः न्हिले । खला व भवा
मछाः पहः दुम्ह । जि थे अण्वः नवाये
म्वाःम्ह । तर जि लिसे गफ जुइबलय् जितः
हे माथ याइगु खँ ल्हाइगु । मे पिं लिसे
अथे मजू । थुलि न्ह्योने थ्यने धुंका नं जिपि
निम्हं पासा पासा । जिपिं मतिनामि मखुनी । थ्व
मतिना धयागु शब्दय् जिपिं निम्हे स्यां मतिनाया
परिभाषा मथूनी । अथे खःसां जिं वयागु मिखाय्
दकलय् अण्वः मतिना खना । वयागु मिखा हे
जिगु मतिना जुल । वं जितः रुवइगु मिखाय् मो ति
खनाच्चना । वं नं अथे हे हिरा खं जुइ जिगु
मिखाय् । जिं हिरा खनी, वं मो ति खनी । आखीर
जिपिं निम्हं हिरामोतिला खत । मेगुकथं धायेगु
खःसा हिरामो ति मतिनाय् न्हूगु संज्ञा बीगु जुइ ।
गबलें गबलें कलेजया पासापिसं जिमित हायेके
थें - हिरामोति हिरामोति धाइगु जिमिसं न्यने
लं । अथे धाइबलय् छकःनिकः व मछालीगु जिं
खं । तर जिं स्यू वयागु मछा पहः । छकःनिकः
जिं वयात हायेके थें धायेगु लैलामजनु,
रोमियोजुलियट, हीररांभा थें हिरामोति नं जूसा
गथे जुइ ? व न्हि जक न्हिला च्वनी । वयागु व
न्हिलाय् जिं थःत न्ह्याइपु ताये के । जिं थःत गन
गन थ्यंके लय्ताया सिमा हे मदये क ।

जिपिं माक्व स्वयाः नं यक्व हे सतिना
वल । कलेजं लीहाँ वनेबलय् वया छँ क्वसं
जिं तया बी । वं न्हिला वने न्हिं धकाः धाइगु
हे जितः तसकं यःगु वया सः जुया बी । सुनानं
छुं धाइला धकाः वयाके छप्ति हे ग्याः पहः
खनेमन्त । जिं वयात न्हिया न्हिथं थथे हे वया
छँ क्वय् तक तया ब्यू थें तायेकीगु । गबलें
गबलें मजू । अथे हे कलेज वनेबलय् नं वया
छँ क्वः जुयाः व पिहाँ वइगु स्वयाः नाप लाक
वने । निम्ह खँ ल्हाल्हां कलेज थ्यंके । गबलें
गबलें लँय् कलेजया मेपिं पासापिं लँय् नाप

लाइ, जिमित घाघः जुइक ।

गुलि याकनं निदँ क्वचाःगु । २०२६ साल
चैत्र १० गते जिमिगु आइ एस्सीया रिजल्ट
वल । निम्हं न्हापांगु श्रेणी पास जुल । जिपिं
सिक्क लय्ताया । वयात आरति स्वीटय्
यंकाः रसमलाइ नका । वयात दकय् यःगु
रसमलाइ धकाः छकः धाःगु लुमना प्यंगः प्यंगं
निम्हेसित अर्डर याना । अवलय् व लय्तायाः
जितः थितुथ्युं वःगु खः । साय्द जिपिं निम्हं
मतिनामि खःसा वं जितः धयेपुयाः मतिनाया
मिखा मिखा ल्वाकीगु खइ । जिपिं निदँ तक
थुकथं सती धुनां नं वं जितः ययेकाः मधाः ।
जिं नं वयात छ यः धकाः धायेमफु । निम्हं
न्ह्याइपुगु लडाईलय् । वं स्वये व बुइ थें, वं
स्वयेवे व बुइथें । वं स्वये जि त्याइ थें, जिं स्वये
व त्याइ थें । न्ह्यैपुगु ल्वापु अन्त मजू - न्ह्या
हे वनाच्चन ।

आइ एस्सी लिपा निम्हं व हे कलेजय्
भर्ना जुया । निम्हेस्यां बोटानी मेजर कया ।
आइ एस्सी थें जिपिं बि एस्सी छगू हे क्लासय्
मलात । जिमित सिक्क म्हाइपुल । निम्ह
रजिष्ट्रेशन अफिसय् वना छगू हे क्लासय्
तया ब्यू धकाः इनाप नं याना । दक्व अन्तिम
निर्णय याये धुकूगुलिं हिलेमछिं धकाः याना
मबिल । निम्हं ख्यू ख्वाः तया लिहाँ वया ।
खःला जिमिगु आज्जु डाक्टर जुइगु खः । बि
एस्सी वनेगु मखु । अथेसां ब्वं मवतलेया लागि
बि एस्सी क्लासय् भर्ना जुयागु खः । निसः त्या
फिस पुलाः । बि एस्सी ब्वब्वं डाक्टर ब्वनेगुया
लागि शिक्षा मन्त्रालय् पाखें छात्रवृत्तिया सुचं
पिदन । कोलम्बो प्लान लिसें थी थी देया
छात्रवृत्ति निवेदन बीत । जिपिं निम्हेस्यां फाराम
भरे याना । फाराम भरे याये धुनेवं क्लासय् वने
नं मं मदया वल । छायाकि जिमिगु मार्क आइ
एस्सीइ अण्वः हयागु दु । त छखें ग्याः । गनं
दरबारया भिटो पावर लगे यानाः जिमित छखे

बाखि

साहित्यिक लय्पौ

जक मलाकीला धका: । अन्तरवार्ता बिया शिक्षा मन्त्रालयय् केशर महलय् ।

छवा: लिपा अन्तरवार्ताया लिच्च: वल शिक्षा मन्त्रालयया नोटिस बोर्डय् । जिपिं निम्हेंसितं MBBS ब्वनेया लागि छात्रवृत्ति दत । सिक्क लयेताया । तर दुखया खँ, व आर जि मेडिकल कलेजय् जुल । जि वंगलादेशया मेडिकल कलेजय् । छक्कल निम्हेसिया ख्वा: खिउँल । थ्व पालय् जिं वयात रसमलाइ मखु, वं जित: लालमोहन नकल - आरति स्वीडसय् ।

लच्छि लिपा जिपिं निम्हं ब्वया वना । इलय् ब्यलय् पौया कालबिल यायेगु बचं कया, बचं बिया । बाये त्यंका: छक: घयेपुया दकलय् न्हापां । छगू अजू अनुभव जुल जित: । सायद वयात नं अथे हे जुल जुइ ।

मोबाइलया घण्टि न्यायेवं हिरामानया लुमन्ति चब्बुत । टेबुलय् च्वंगु मोबाइल ल्हवना: न्हाय्न्पय् तल,

-हलो.....

-जि बिमला... उखें स: वल ।

बिमला हिरामानया कलेजया पासा । उगु इलय् हिरामान व मोतिशोभायात हायेका च्वनिम्ह

-यय्...छु दु बिमला मय्जु ? यक्व: लिपा फोन वल । गन काठमाडौंलय् ख:ला ?

अप्व: धयाथें पिनेपिने जुयाच्चनिम्ह बिमला शाक्य ।

-‘ख: थुखे हे ख: । बैककं थुखे हे च्वनेत वयागु निला दत ।’

-‘अय्सा आ: मचाखाचा उखे हे त्व:ता जोइपोइ निम्ह थन हे न्ह्याबलेंया लागि जुलका मखुला ?

-‘ख: । छन्त छता खँ कने धका: ।’

-‘छु खँ?’

-‘छिमि सतीम्ह पासा मोतिशोभा नेपा:

चाह्यु वयाच्चंगु दु । स्यूला छं ?’ मोतिशोभाया नां कायेवं हिरामान छभा: भस्के जुल । वं मोतिशोभाया पुलांगु खँ लुकंका जक च्वंगु, बिमलाया फोनं हिरामान अत:मत: कन । छक्कल न्ह्यस: तल बिमला यात -

-‘छु धया: व बेपत्ताम्ह मोतिशोभा ला ?’

-ख: धया ख:

-गबलय् व:गु ? मोतिशोभाया खँ न्यने यल हिरामान यात । डाक्टर ब्वना वये धुंका: छक: नापला:गु ख: हिरामानं । अबलय् मोतिशोभाया छ्येनय् वं ह्याउँगु सिन्वा खंसां निसें हिरामानयात वयागु ख्वा:तकं स्वये मय् । फनक्क पहिला वंगु । तर थौं उलिमछि दँ लिपा बिमलां मोतिशोभाया खँ पिका:बलय् वयात पुलांगु खँ हाकनं साला काल ।

-गवले व:गु ले व: ?’ हिरामानं फोनय् हे न्ह्यस: तल ।

-‘छवा: दत । छन्त छक: नाप लायेगु इच्छा या:गुलिं फोन यानागु । नाप लायेगु मखुला ?’

हिरामानं छकलं लिस: बिइमफुत । पलख सुम्क च्वन ।

-‘ज्यू, वं नाप लायेगु इच्छा क्यंसा जिं छाय् म्हा धाये ? बरु गन नाप लाये ?

‘जिगु हे छेय् वा ले कन्हे २ बजे न्हिनय् ।’

‘ज्यू जि वये ।’ हिरामानं फोन दिकल ।

छाय् वं जित: उलिमछि लिपा नाप लायेगु इच्छा यात ? थ:त थम्हं न्ह्यस: तल हिरामानं ।

वया छु खँ कनेगु दु ? चत्त हे जित: ल्वमंका वंम्हेसिके छु खँ दइ ? वनं व वया भा:त जि थें मखु धका खँ कनेत नाप लायेगु स्व:गु जकं मखुला ? आ:जि थें ख: वा मखुया खँ ल्हाना:

साध्य मजुइ धुंकल । जि नं बिहा: जुइधुंकूम्ह । मचाखाचा दये धुंकूम्ह । थ्य मथ्यं ६४ दँ दये धुंकल । अथे हे वया नं मचाखाचा दये धुंकल जुइ । जि थें व नं ६४ दँ दये धुंकूम्ह । जि ला बाज्या तकं जुइ धुंकूम्ह । सीमदयेक बुरा जुजुं वयाच्चंम्ह । वया नं जि थें ख्वा: कयेकये कुने धुंकल जुइ । न्हापा गंसीचा:म्ह आ: ला ग्वारामिरा चिना: गनं ...गन अजि तकंजुइ धुंकल जुइ । म्हसीके तकं फइला मफइला । छुया म्हमसी ? थ:के तुं न्ह्यस: तल हिरामानं । वया मिखाय् उगु ईया मोतिशोभाया ख्वा: इवातां न्ह्योने दं वल । तुयूगु ख्वा: । ख्वबलि मिखा । चाकमला:गु ख्वा: । न्ह्यावलें हाकूगु अज:या सिन्ह: कपालय् । छाइसे च्वंगु न्हाय् । तबाला:गु म्हुतुसि । न्हिलीबलय् सुनानं ध्वये मफु वयात । गवलें गवलें वयागु समा: नं राणानी थें नं च्वं। मोतिशोभा लुमंकु लुमंकु हिरामान हानं छक: तन ।

हिरामानयात दुई बजे जुइके हथाय् चाल । उखुनु हे वं छयँनय् रंग तया: त:गुलिं तुयूगु सँय् हाकुके म्वा:ल वयात । दारी मखा:गु प्यन्हु दये धुंकूगुलिं दारी खात । दारी याना: ख्वा: बार्मलायाये य: । हाकनं छक: हिरामान याके शक्ति ब्वलना वल । वं थ:त नीदँया कल्पना यात । धाधा मधां १ बजे जुल । न्यासी वनेगु स्वयां त्याक्सी च्वना वनेगु बिचा: यात । बानेश्वर तक वने मा:गु । न्यासी वना: जिइ ख्वा: मवल । उकिसनं पुलिया ल्वय् दुम्ह । ताउत न्यासि वने मफु । छें नं पिहाँ वल । त्याक्सी छगलय् प्यतुल 'न्हूगु वानेश्वर वनेगु, एभरेष्ट बैकया लिक्कस' ड्राइभरयात गन्तव्य कन । त्याक्सी न्ह्यात । भद्रकाली थ्यंबलय् ट्राफिक जाम खनेदत । छुकिया जाम थ्व ? जुलुस जकं व:गु ख: कि ? तर जुलुस मखुसे राष्ट्रपतिया एयरपोर्ट वनेगु सवारी जुयाच्चन । सिंहंदरवार निसें लँ पना त:गु । का फुत ।

मोटर न्ह्या मवं । छक: छक: घडी मिखा ब्वइगु - पाउने दुई जुइन । दुई जुल । साढे दुई जुल । अहँ लँ पनात:गु चा के मचा: । त्याक्सीया मिटर ख्वारा ख्वारा थहाँ वनाच्चन । तिन बजे जूबलय् बल्ल तीजक मोटर न्ह्यात । हिरामानया सास: थहाँ वल । बिमलायात फोन छक्क: यायेगु मति तल । फोन यात । बिजि टोन जक वयाच्चन । वं घडी छक: मिखा ब्वल । सवा तीन । एभरेष्ट बैकया क्वसं त्याक्सी दिकल । बिमलाया छें पाखे तपलाखं पला: न्ह्याकल । छँया कलबेल तिल । पलख लिपा बिमला लुखाय् वल ।

हिरामानयात छक: तोल्हे जुया: स्वल

-२ बजे धयागु गुलि बजे जुल ?'

-ख: एक घण्टाला जामय् लात । मोतिशोभा तले ला?

-व ला १ बजे हे थ्यंकूगु ख: । पिल पिल, पियां खइ मखुत धाल । व वइ हे मखुत धका: पलख जाल वना छ्व:गु ।

विमलाया खँ न्यना: हिरामानया ख्वा: छपातं सुपाचं त्वपुत । हिरामानया ख्यूया वंगु ख्वा: स्वया: बिमला न्ववात

-नु थहाँ वने । व वंसां जि लिसे ला खँ ल्हाये ज्यू नि । अं मोतिशोभा छ लिसे नाप ला लाये मखन । अथेसां वं भ्वं छकू त्व:ता थकूगु दु ।

निम्हं खापा तिना थहाँ वन । सोफाय प्यतुल हिरामान । बिमलां मोतिशोभा च्वया थकूगु चिकीचा कूगु भ्वं हिरामानयात बिल । हिरामानं भ्वं चायेका: स्वल हत्तपत्तं । निगू लाइनय् मोतिशोभा च्वयातल -जिं जिमि काय् या नां तया 'हिरा' । छं नं छिमि म्हाय्या नां 'मोति' त:गु दु जुइ ।

हिरामानया मिखा जायेक बुँगाचा लुयावल । अले वं मतिमती धाल - छ त्यात । जि बुत । छंके हिरा दत । जिके मोति मन्त ।

बाखि

साहित्यिक लय्पौ